



Stjórnarráð Íslands
Umhverfis-, orku- og
loftslagsráðuneytið

urn@urn.is
545 8600

Skuggasundi 1,
101 Reykjavík

stjornarradid.is

Reykjavíkurborg
Ráðhúsinu
101 Reykjavík

Reykjavík 6. september 2022
Tilv.: UMH22080029/8.13

Vísað er til erindis skóla- og frístundasviðs Reykjavíkurborgar, sem barst ráðuneytinu með tölvupósti 17. ágúst sl., þar sem óskað er eftir undanþágu frá ákvæðum 14. gr. og 38. gr. reglugerðar nr. 941/2002 um hollustuhætti, vegna grunnskólastarfsemi á þriðju hæð í húsnæði Knattspyrnusambands Íslands að Reykjavegi 15 í Reykjavík. Óskað er eftir undanþágu frá ákvæði 1. ml. 1. mgr. 14. gr. reglugerðarinnar þar sem segir að „Húsnæði, þ.m.t. starfsmannabústaðir, starfsmannabúðir og húsnæði stofnana og fyrirtækja, sem fjallað er um í reglugerð þessari, skulu hafa hlotið staðfestingu leyfisveitanda byggingarleyfis á því að starfsemin sé í samræmi við samþykktu notkun húsnæðisins.“, frá ákvæði 2. mgr. 38. gr. reglugerðarinnar þar sem segir að „Í skólum skal vera aðstaða til aðhlyningar nemenda vegna skyndiveikinda. Skal þar vera að lágmarki legubekkur, stóll og handlaug. Þar sem heilsugæsla er starfrækt í skólum, skal hún fullnægja kröfum sem gerðar eru til lækningastofa.“ og frá ákvæði 1. ml. 3. mgr. 38. gr. þar sem segir „Handlaug skal vera í hverri kennslustofu í grunnskólum.“

Fram kemur í erindinu frá 17. ágúst að sótt sé um tímabundna undanþágu vegna kennslu 75 barna úr Laugarnesskóla frá skólabyrjun 22. ágúst sl. fram að jólaleyfi 19. desember nk. Ástæða beiðninnar er seinkun á afhendingu færanlegra stofa á lóð Laugarnesskóla og því þurfi að útvega fjórum bekkjum í 6. bekk kennsluhúsnæði. Einnig kemur fram að tími barnanna í fyrirhuguðu rými sé frá klukkan 8:00-14:10, aðstaða kennara verði í húsnæði KSÍ en að mestu leyti sé um að ræða fjóra kennara og skólaliða. Hádegismatur verður borinn fram í mötuneyti skólans í Laugarnesskóla.

Samkvæmt 1. mgr. 41. gr. laga nr. 7/1998 er ráðherra heimilt þegar sérstaklega stendur á, að fenginni umsögn heilbrigðisnefndar eða Umhverfisstofnunar, að veita undanþágu frá einstökum greinum reglugerða sem settar eru skv. 4. og 5. gr. laganna. Samkvæmt 74. gr. reglugerðar nr. 941/2002 er ráðherra heimilt að fenginni umsögn heilbrigðisnefndar og Umhverfisstofnunar að veita undanþágu frá einstökum ákvæðum reglugerðarinnar.

Ráðuneytið óskaði eftir umsögnum Heilbrigðisnefndar Reykjavíkur og Umhverfisstofnunar um undanþágubeiðnina með tölvupósti 18. ágúst sl.

Í umsögn Heilbrigðisnefndar Reykjavíkur sem barst ráðuneytinu 1. september sl. kemur fram að Heilbrigðiseftirlitið veiti jákvæða umsögn um tímabundna undanþágu frá framangreindum

ákvæðum 14. gr. og 38. gr. reglugerðar nr. 941/2002 fyrir grunnskólafseminum í framangreindu húsnæði. Fram kemur einnig að ef umbeðin undanþága verði veitt þurfi rekstraraðili að sækja um tímabundið starfsleyfi fyrir grunnskólafseminum í húsnæðinu á því tímabili sem undanþágan taki til.

Í umsögn Umhverfisstofnunar sem barst ráðuneytinu 2. september sl. segir að stofnunin geri ekki athugasemd við að umhverfis-, orku- og loftslagsráðherra veiti tímabundna undanþágu, frá 14. gr. og 38. gr. reglugerðar nr. 941/2002, að því gefnu að öðrum skilyrðum starfsleyfis verði fylgt í hvívetna, ásamt þeim skilyrðum sem ráðherra kann að binda undanþáguna, verði hún veitt.

Ráðuneytið óskaði eftir afstöðu Byggingarfulltrúa Reykjavíkur til beiðnar um undanþágu með tölvupósti 1. september sl. Í svarpósti Byggingarfulltrúa sem barst ráðuneytinu 2. september sl. kom fram að ekki væri gerð athugasemd við að veitt yrði undanþága frá ákvæðum reglugerðar á þáttum er varða hollustuhætti, heilbrigði og aðra þætti sem reglugerðin fjalli um. Hins vegar er bent á að ekki sé til staðar heimild til að veita undanþágu frá ákvæðum mannvirkjalaga og byggingarreglugerðar er varða öryggi fólks í byggingum, í þessu tilfalli barna og starfsfólks í skólum. Verið sé að vinna umsókn um byggingarleyfi fyrir húsnæði KSÍ í Laugardal í samráði við embætti Byggingarfulltrúa og slökkvilið höfuðborgarsvæðisins og í þeirri vinnu hafi verið bent á nauðsyn þess að sótt yrði um undanþágu frá ákvæðum reglugerðar nr. 941/2002.

Ráðuneytið bendir á að áður hefur verið veitt undanþága frá fyrrgreindum ákvæðum 14. og 38. gr. reglugerðarinnar fyrir notkun húsnæðisins sem skólahúsnæðis með bréfum dags. 9. apríl 2019 og 11. febrúar 2022. Í beiðni um undanþágu kemur fram að ástæða beiðnarinnar sé seinkun á afhendingu færanlegra stofa á lóð Laugarnesskóla og útvega þurfi fjórum bekkjum í 6. bekk kennsluhúsnæði. Ráðuneytið telur ljóst að nauðsynlegt er að tryggja tímabundið húsnæði fyrir nemendur skólans þar sem afhending færanlegra stofa hefur tafist. Gera Heilbrigðisnefnd Reykjavíkur og Umhverfisstofnun ekki athugasemd við að undanþágan verði veitt. Í ljósi framangreinds fellst ráðuneytið á að veita skóla- og frístundasviði Reykjavíkurborgar undanþágu frá ákvæði 1. ml. 1. mgr. 14. gr., frá ákvæði 2. mgr. 38. gr. og frá ákvæði 1. ml. 3. mgr. 38. gr. reglugerðar nr. 941/2002 um hollustuhætti, vegna grunnskólahalds á þriðju hæð í húsnæði Knattspyrnusambands Íslands að Reykjavegi 15 í Reykjavík.

Skóla- og frístundasvið Reykjavíkurborgar skal tryggja öryggis- og hollustuháttareglur. Starfsemin er starfsleyfisskyld og háð eftirliti Heilbrigðisnefndar Reykjavíkur. Undanþága þessi er bundin því skilyrði að Heilbrigðisnefnd Reykjavíkur veiti starfsleyfi fyrir grunnskólafseminum í umræddu húsnæði Knattspyrnusamband Íslands að Reykjavegi 15 í Reykjavík.

Undanþága þessi gildir lengst til 20. desember 2022.

Heilbrigðisnefnd Reykjavíkur skal birta undanþágu þessa á vefsíðu sinni sem og eftirlitsskýrslur vegna starfseminnar.

Fyrir hönd ráðherra

Íris Bjargmundsdóttir

Trausti Ágúst Hermannsson

Ljósrit: Heilbrigðisnefnd Reykjavíkur
Umhverfisstofun